

Arnat angutillu naligiissitaanissaat pillugu Inatsisartut inatsisissaattut nr. xx, uu. qqqq 2003-meersussatut siunnersuut

Siunertaa

§ 1. Inatsimmi siunertarineqarpoq arnat angutillu akornanni, tassa angerlarsimaffimmi inooqatigiinnermi aammalu inuiaqatigiinni suliani tamani naligiissitaanerup siuarsarneqarnissaa, aamma arnat angutillu assigiimmik naleqarnerat aallaavigalugu naligiimmik sunniuteqarnissaat periarfissaallu ilanngullugit. Inatsimmi siunertarineqartoq aammattaaq tassaavoq suaassuseq pissutigalugu toqqaannartumik toqqaannangitsumilluunniit assigiinngisitsisoqarnissaanik akiuinissaq.

Suiaassuseq pissutigalugu assigiinngisitsinissamik inerteqqut

§ 2. Arnat angutillu pisortat ingerlatsiviisa aamma inuussutissarsiutigalugu suliffeqarfiit iluanni naligiimmik atugassaqartinneqassapput.
Imm. 2. Innuttaasut, aamma ilaqutariit, meeqqat inuusuttullu pisortanut oqartussaasunut saaffiginnissuteqarneranni oqartussaasut aalajangiitillutik, siunnersuinerminni ilitsersuinerminnilu aammalu allatigut naliliinerminni arnat angutillu assigiimmik naleqarnerat aallaavigissavaat, matumani illuatungeriit aappaata illuatungeriilluunniit marluullutik immikkut tapersorneqarnissaannik isumaliutersuuteqarneq ilanngullugu eqqarsaatigalugu.

Namminersortut suliffeqarfiutaasa pisussaaffii

§ 3. Namminersortut suliffeqarfiutaasa suliassaqarfimmik iluanni naligiissitaanissaq sulissutigissavaat, kiisalu tamanna pissutissaqaraangat pilersaarusiornerni ingerlatsinernilu naligiissitsineq ilaatissallugu.
Imm. 2. Namminersortut suliffeqarfiutaat qulit sinnerlugit sulisoqartut sulisut suaassutsimikkut agguataarsimanerat kiisalu ukiumi pineqartumi naligiissitaaneq siuarsarniarlugu sulisoqarnermik ingerlatsinerit naligiissitaanermut Naalackersuisumut ukiut tamaasa nalunaarutigisassavaat. Nalunaarut 1. marts nallertinnagu tunniunneqassaaq, siullermillu ukiumut 2004-mut.

Pisortat oqartussaasut pisussaaffii

§ 4. Pisortat oqartussaasut suliaasaqarfimmik iluanni naligiissitaanissaq sulissutigissavaat, kiisalu tamanna pissutissaqaraangat pilersaarusiornerni ingerlatsinernilu naligiissitsineq ilaatissallugu.

Imm. 2. Pisortat ingerlatsivii aamma suliffeqarfii qulit sinnerlugit sulisoqartut sulisut suaassutsimikkut agguataarsimanagerat kiisalu ukiumi pineqartumi naligiissitaaneq siuarsarniarlugu sulisoqarnermik ingerlatsinerit naligiissitaanermut Naalackersuisumut ukiut tamaasa nalunaarutigisassavaat. Nalunaarut 1. marts nallertinnagu tunniunneqassaaq, siullermillu ukiumut 2004-mut.

Ataatsimiititaliat siulersuisullu

§ 5. Pisortat ataatsimiititaliaat, isumalioqatigiissitaat assigisaallu inuiaqatigiinnut pingaarutilimmik malittarisassanik piareersaasussatut imaluunniit pilersaarusiortussatut Naalackersuisunit pilersinneqartut angutinik arnanillu tamarmik sapinngisamik amerlaqatigiinnik ilaasortaqaassapput.

§ 6. Siulersuisut, sinniisoqarfiit imaluunniit ataatsimoortumik siulersuiffiit taamatut ittut, Naalackersuisut ilaasortaaitassanik toqqaavigisartagaat angutinik arnanillu tamarmik sapinngisamik amerlaqatigiinnik ilasortaqaartassapput.

Imm. 2. Imm. 1-imi aalajangersagaq suliffeqarfinnut imminnut pigisunut, soqutigisaqatigiiffinnut, aktiaateqarluni ingerlatseqatigiiffinnut aamma piginneqataassuteqarluni ingerlatseqatigiiffinnut pisortat ingerlatsineranni ilaasutut naatsorsuunneqarsinnaanngitsunut aamma atuuppoq, suliffeqarfinnut nammineq pigisunut taakkununga aningaasartuutit annertunerpaatigut Nunatta Karsianit matuneqartarata, imaluunniit ingerlatseqatigiiffiup annertunersaa Namminersornerullutik Oqartussanit pigineqarpat.

§ 7. Oqartussaasut, siulersuisut il.il. §§-ini 5-mi aamma 6-imi taaneqartutut ittut ataatsimiititaliani il.il. ilaasortamik ataatsimik siunnersuuteqartussat, tak. §§-it 5 aamma 6, angummik arnamillu siunnersuuteqassapput. Ilaasortat amerlanerusut siunnersuutigineqassappata arnat angutillu amerlaqatigiit siunnersuutigineqassapput. Kikkut ilaasortatut toqqagaanissaannik aalajangiiniarnerminni ataatsimiititaliat il.il., tak. §§-it 5 aamma 6, arnanik angutinillu amerlaqatigiinnik ilaasortaqaartarnissaat Naalackersuisut anguniassavaat.

Imm. 2. Oqartussaasup siulersuisulluunniit il.il. imm. 1-imi aalajangersagaq saneqqussinnaavaat, taamaaliornissamut immikkut ittunik pissutissaqarpat, taamaaliussagunillu tamatumunnga tunngavilersuummik saqqummiussissallutik.

Imm. 3. Oqartussaasut siulersuisulluunniit il.il. imm. 1 naapertorlugu ilaasortassanik inassuteqanngippata Naalackersuisut aalajangersinnaavaat siulersuisut il.il. pineqartumik pineqartunilluunniit ilaasortaqaanngikkaluarlutik ingerlasinnaasut. Tamanna aamma atuuppoq imm. 1-imi aalajangersakkap sanioqqunnissaanut imm. 2 naapertorlugu tunngavilersuutaasoq Naalackersuisut akuerisinnaanngippassuk.

§ 8. Naalackersuisoqarfiit tamarmik immikkut siulersuisunut il.il. ilaasortassanik, tak. § 6, qinersisoqareernerit tamaasa siulersuisut il.il. § 6-imi pineqartunut ilaatinneqartut katitigaaneri pillugit naligiissitaanermut Naalackersuisumut nalunaaruteqartassapput.

Arnat angutillu sulinermit tunngatillugu naligiissitaanerat

§ 9. Sulisitsisup kialuunniit angutinik arnanillu sulisoqartup atorfinitsitsinerni, suliffimmi nuutsitsisarnerni, atorfimmi qaffatsitaanerni soraarsitsinernilu naligiimmik pisassavai, suliffimmilu naligiimmik atugassaqaqtissallugit.
Imm. 2. Inatsit atorneqassanngilaq naligiimmik pinnittarnissaq ataatsimut isumaqatigiissutini tamatuma assinganik pisussaaffigineqarpat.

§ 10. Aningaasarsiaqarluni sulisuusumik, taassuma naartunera ernereernerulluunniit kingorna sulinngiffeqarnera pissutigalugit imaluunniit aningaasarsiaqarluni sulisuusumik, naartunermi, erninermi meeravissiaartaanermilu sulinngiffeqartarneq il.il. ullormusiaqartarnerlu pillugit Inatsisartut peqqussutaat naapertorlugu sulinngiffeqarnissamik piunasaqarsimasumik soraarsitsinissaq inerteqqutaavoq.

§ 11. Sulisitsisup kialuunniit angutinik arnanillu sulisoqartup inuussutissarsiornermi ilitserorneqartarnermut, inuussutissarsiornermi ilinniartitaasarnermut, inuussutissarsiornermi pikkorissartarnermut, ingerlaqqiffiusumik ilinniagaqarnernut allanilu sungiusaqqittarnermut tunngatillugu naligiimmik pisassavai.
Imm. 2. Naligiimmik pinnittarnissamik pisussaaffik aamma atuuppoq suliffeqarfinnut, inuussutissarsiornermi ilitseruussisarnissamik ilinniartitsisarnissamillu imm. 1-imi taaneqartunik ingerlatsisunut tamanut.

§ 12. Atorfimmik inuttassarsiuinermi imaluunniit inuussutissarsiutinut ilinniartitsinissami il.il. nalunaarneqassanngilaq aalajangersimasumik suaassusilik ujjartorneqarnersoq salliutinneqassanersorluunniit.

Arnat angutillu assigiimmik akissarsiaqartinneqarnerat

§ 13. Sulisitsisup kialuunniit arnat angutillu, sulianut assigiinnut imaluunniit sulianut assigiimmik naleqartinneqartunut naligiimmik akissarsiaqaqtissavai, aammattaq akissarsiamikkut atugarisaat assigiississallugit.
Imm. 2. Suliap naleqassusianik naliliineq piginnaasat naliliinermilu tunngaviusariaqartut allat ataatsimut nalilernerisigut pissaaq.

§ 14. Aningaasarsiaqarluni sulisuusup § 13-imut akerliusumik allanit appasinnerusunik akissarsiallip akissarsiat assigiinngissutaat piunasaqaatigisinnavai.

§ 15. Sulisitsisup aningaasarsiaqarluni sulisuusoq, taassuma naligiimmik akissarsiaqarnissa-mik, aammalu akissarsiatigut assigiimmik atugaqarnissamik piumasaqarnera pissutigalugu soraarsissinnaangilaa.

Imm. 2. Soraarsitsinerup imm. 1-imi malittarisassat uniorlugit pisimannginnera sulisitsisup uppernarsagassaraa. Tamannali atuutissanngilaq aningaasarsiaqarluni sulisuusup naligiimmik akissarsiaqarnissamik piumasaqarneraniit ukioq ataaseq qaangiutereersoq soraarsitsisoqartillugu.

Imm. 3. Soraarsitsineq imm. 1-imi malittarisassat uniorlugit pisimasoq, taamaattoqar-neraasoqareerneratigut atortinneqassanngilaq, tamannali immikkut pissutissaqartillugu illuatungeriit soqutigisaasa naliliiffigereernerisigut sulisitsinerup ingerlateqqinneqarnissaanik sulisitsinerulluunniit nangingneqaqqinnissaanik piumasaqarnissaq naapertuuttuosorinanggippat atuutissanngilaq. Tamatumunnga taarsiullugu aningaasarsiaqarluni sulisuusup soraarsitap taarsiivigineqarnissani piumasarisinnaavaa.

§ 16. Isumaqatigiissutini aningaasarsiaqarlutik sulisuusut assigiimmik akissarsiaqartitaaffii-ni, aamma akissarsiatigut assigiimmik atugassaqartitaaffiini, taamaattorli aningaasarsiaqarluni sulisuusumut suliffeqarfimmulluunniit naammaginartumik tunngavilersorneqanngitsunik soraarsitsinerni ajunngitsorsiassat pillugit malittarisassaqaanngitsuni § 15 taamatulli atuutissaaq. Suliaq sulisartoqarnermi maleruagassanik aaqqissuussineq naapertorlugu suliarineqarsinnaavoq, taamaaliornissamut piumasaqaataasut aamma eqqortinneqarsimappata.

§ 17. Sulisitsisoq inatsit naapertorlugu naligiimmik akissarsiaqartitsisussaanerminik, aamma akissarsiatigut assigiimmik atugassaqartitsisussaanerminik naammassinninngippat aningaasarsiaqarluni sulisuusup piumasaqaat eqqartuussivitsigut aalajangersartissinnaavaa.

Imm. 2. Arnat angutillu akissarsiaqarnikkut assigiinngisinneqarpata sulisitsisup pisussaaffigaa qularnarunnaarsissallugu suliap pineqartup assigiinngitsumik naleqarnera.

Immikkut akuersisarneq

§ 18. Inuussutissarsiornermik ingerlatat ilinniartitaanerilluunniit ilaanni ingerlataqartup arnaanissaa angutaanissaaluunniit aalajangiisuutinneqarpat Naalakkersuisut, Naligiissitaanissamut Siunnersuisoqatigiit oqaaseqaateqartereerlugit, akuersissutigisinnaavaat §§-ini 9-mi, 11-12-milu aalajangersakkat sanioqqunneqarnissaat.

Imm. 2. Immikkut ittunik pissutissaqartoqartillugu § 2-mi aalajangersakkat sanioqqunneqarnissaat Naalakkersuisut suliffeqarfimmut inuussutissarsiornermik ingerlatalimmut pisortalluunniit ingerlatsiviannut akuersissutigisinnaavaat.

Imm. 3. Arnat angutillu naligiimmik periarfissaqarnissaat siuarsarniarlugu, pingaartumik suliffeqalernissamut, ilinnialernissamut il.il. assigiinngissutaasut qaangerniarlugit § 2-mik aamma §§ 9 - 12-imik sanioqqutitsilluni suliniuteqartoqarnissaa Naalakkersuisut akuerisinnaavaat.

Taarsiissuteqartarneq

§ 19. Inuit § 2-p imaluunniit §§ 9 -12-ip unioqutinneqarnerisigut pisinnaatitaaffiagaasimasut taarsiivigineqarsinnaapput.

§ 20. Aningaasarsiaqarluni sulisuusooq § 10-mut akерliusumik imaluunniit §§-it 9 aamma 11 naapertorlugit naligiimmik pineqarnissamik piunasaqarsimanera pissutigalugu soraarsitaappat sulisitsisooq taarsiissutinik akiliissaaq.

Imm. 2. Imm. 1 naapertorlugu taarsiissutissat sapaatip akunnerini 39-ni akissarsiat sinnerlugit angissuseqarsinnaanngitsut, aningaasarsiaqarluni sulisuusup atorfeqarnerata sivisussusia suliamilu pissusiusut tunngavigalugit aalajangersarneqassapput. Sulisitsisup § 10-mik unioqutitsineranut taarsiissutissat, aningaasarsiaqarluni sulisuusup piffissami atorfirmik soraarsinneqarfimmini sivisunerpaamik sulinngiffeqarsinnaaffiani aningaasarsianit ikinnerusinnaanngillat.

Imm. 3. Taamatuttaaq imm. 1 aamma 2 atuutissapput ataatsimut isumaqatigiissutit naapertorlugit assigiimmik pinninnissamik pisussaaffeqarpat, isumaqatigiissumili aningaasarsiaqarluni sulisuusumut suliffeqarfimmulluunniit naammaginartumik tunngavilersorneqanngitsunik soraarsitsinermi pineqartoq taartisiassaqaanngippat. Suliaq sulisartoqarnermi maleruagassanik aaqqissuussineq naapertorlugu suliarineqarsinnaavoq taamaaliornissamut piunasaqaataasut naammassineqarsimappata.

Imm. 4. § 15, imm. 3 naapertorlugu taarsiissutigineqartut aningaasarsiaqarluni sulisuusup soraarsitaasimasup ukiumi kingullermi agguaqatigiissillugu akissarsiai naapertorlugit naatsorsorneqartussat sapaatip akunnerini 78-ini akissarsiat sinnersimassanngilaat, aningaasarsiaqarlunilu sulisuusup atorfeqarnerata sivisussusia suliamilu pissusiusut tunngavigalugit aalajangersarneqassallutik.

Uppernarsaasiisussaaneq

§ 21. Inuk, § 2, §§ 9 - 13, § 15 aamma § 17, imm. 1 naapertorlugit unioqutitsivigineqartutut imminut isigisoq pissusiviusunik toqqaannartumik toqqaannanngitsumilluunniit assigiinngisitsisoqarneranik ersersitsisunik takussutissippat, illua'tungiusup pisussaaffigaa naligiissumik pinnittusaaanermik tunngaviusup unioqutinneqarsimannginneranik uppernarsaanissaq.

Imm. 2. Sulineramik inuussutissarsiteqartoq soraarsitaappat, § 10 takuuk, naartunerminik sulisitsisuminut ilisimatitsissuteqareermigut sulisitsisup uppernarsassavaa soraarsitsineq naartunerminik pissuteqaanngitsoq.

Atuussinnaassuseqaannginneq il.il.

§ 22. Isumaqatigiissutini aalajangersakkat suliffeqarfinnilu malittarisassat il.il. §§ 9 - 11-mi, 13-imi aamma §§ 15 - 17-imi allassimasunut akерliusut

atuussinnaassuseqanngillat. Taamanna aamma atuuppoq namminersorlutik inuussutissarsiortunut malittarisassani aalajangersarneqarsimasunut il.il.

Imm. 2. Aammattaaq isumaqatigiissutini aalajangersakkat suliffeqarfinnilu malittarisassat il.il. sulisitsisumut ataasiinnaanngitsumut atuuttut, §§ 9 - 11-mi, § 13-imi aamma §§ 15 - 17-imi taagorneqartut iluini angutinik arnanillu assigiinngisitsiviusut atuussinnaassuseqanngillat. Tamanna aamma atuuppoq namminersorlutik inuussutissarsiortunut malittarisassani aalajangersarneqarsimasunut il.il.

§ 23. Aningaasarsiaqarluni sulisuusup inatsit naapertorlugu pisinnaatitaaffini iperaannarsinnaanngilai.

Pinerluttulerinermi inatsisitigut pineqaatissiisinnaanerit

§ 24. §§ 9 - 12-imi unioqqutitsisut akiliisitaasussanngorlugit eqqartuunneqarsinnaapput.

Imm. 2. Aktiaateqarluni ingerlatseqatigiiffik, piginneqataassuteqarluni ingerlatseqatigiiffik, piginneqatigiilluni ingerlatseqatigiiffik assigisaalluunniit unioqqutitsippat pineqartuni inatsisitigut inummut naligititaasoq akiliisitaanissamut akisussaatinneqarnissamik pisussaaffilerneqarsinnaavoq. Namminersornerullutik Oqartussat, kommuni kommunilluunniit suleqatigiiffiat, kommunalbestyrelsit nunaqarfinnilu aqutsisut il.il. pillugit Inatsisartut inatsisaanni § 64-imi ilaatinneqartut arlaat unioqqutitsippat, Namminersornerullutik Oqartussat, kommunalbestyrelsi imaluunniit kommunit suleqatigiiffiat akiliisitaanissamut akisussaatinneqarnissamik pisussaaffilerneqarsinnaavoq.

Atuutilersitsinermik atorunnaarsitsinernillu aalajangersakkat

§ 25. Inatsit 1. maj 2003-mi atuutilerpoq.

Imm. 2. Inatsit aalajangersakkallu tulliuttuni allassimasut atorunnaarsinneqarput:

1) Arnat angutillu assigiimmik akissaateqartinneqarnerat pillugu inatsit nr. 32, 4. februar 1976-imeersoq.

2) Sulinermi erninermullu atatillugu sulinngiffeqarnermi il.il. angutit arnallu assigiimmik pineqarnissaat pillugu inatsit nr. 244, 19. april 1989-imeersoq.

3) Naartunermi, erninermi meeravissartaarnermilu sulinngiffeqartarneq il.il. ullormusiaqartarnerlu pillugit Inatsisartut peqqussutaanni nr. 12-imi 31. oktober 1996-imeersumi § 4.

Namminersornerullutik Oqartussat, ulloq uu. qq 2003.

Hans Enoksen

/

Finn Karlsen